

BKI
publication

Rev. Dr. Jangkholam, Ph.D

**Galpi thumna
Jouva
Kithodohkit
Nading Lampi**



Galpi Thumna Jouva Kithodohkit Nading Lampi

Rev Dr Jangkholam Haokip, PhD

Copyright ©2025 by BKI

All rights reserved. Asunpa phalna louva hiche lekhabu hi koiman thuchang hihen lang abu pumpi hijongleh ama a banga akitadoh thei louding ahi.

Thubulphu

Khohethei mihemkhat dingin tulai gam leh nam thohgimnaho leh eimasung lhahsamna hohi thoh hahsa tah ahi. Eima deidei a bolthei hileh inam dalha a namdang kilhen jong kium meithei ahitai. Hinlah namkhat kiti hi Pathen hetpi leh Ama phatsahna a kon a hung umdoh ahin, Pathenin umhen ati sunga chu umding ahi; ahilouleh, Pathen phatsah toh kilhon a amiho apanjou chan uva umding ahi.

Hiche jeh a hi namkhat sunga um ihileh hiche nam chu Pathen deibanga semdoh ding hi igel diuleh ipanna diu umsun ahi. ‘Ka nam kadeipoi’ tia semphat ding gellouva asetna bou seileho chu atohding kihetlouho ahiuvin, amaho chu nam dangah lut jongleo detdeh loudiu ahi.

Bolding dol chu, Pathenin Kuki¹ nam hi angailut

¹Kuki kiti hi tupet a Manipur a umho midanghon eihetna uleh thusim ineina pen u ahijeh a hiche min hi kimang ahi. Hiche hi Manipur a dinga eiho jouse min a isemdoh diuham, ahilouleh tribe neokhata isemdoh dingham tihi eiho khuta um ahi. Nam hi aki semchaisa umlou, isei dan dan a umdohji ahi. Nampi min ahi tia isei sei leh nampi min hidoh ding, paokhat tho ho bou a ding ahi iti tiuleh hichu hung kisoah ding ahi. Athahkhat semkit sanga aumsa semhoi phajo ham, hiche jong eiho khuta um ahi.

jeh a atungdoh dingleh asemhoi dinga hiche nam a hi eipensah u ahin (chuti lou hileh namdanga ina pen diu), hiche hi kipah tah leh thanom tah a ipomcheh uva, Nachang laidon banga kilung tohtah a iki thahpat kitdiu ahi.

Hiche lekhabu neocha sunga hi tuchung galpi thumna a kona Pathen deibanga nampi ingailut dingdan uleh isemdoh dingdan u aban ban a imudoh diu ahi.



I. NAM, NAMKHAT, CHULEH PATHEN TUNDOH NAMKHAT

“[Pathenin] khat a konin vannoi mi chitin namtin asemin, amaho chu phat ateppehin, achennaong jong gangi asempheh e.” Acts 17:26.

Nam umdan: ‘Nam’ kiti hi mihem ahi. Mihem ahing ahibanga namjong ahing ahi. Hinlah mihem achanga namkhat hitheilou ahi. Phungkhaikhat jong achanga namkhat kiti theilou ahi. Nam akiti phatleh phung le chang kihuikhomna in ahop joulou mihem tapi jat khat a umkhomho chu ahive. Eiho dinga A to Z kiti Aimol tribe a pat Zou tribe sunga umho jouse chu Namkhat ihive. India chamlhat jou in tapi in kikhen jong leohen, hiche tribe a ikikhenna hou hi nam a kikhenna hilou ahi.

Ajeh chu, Namkhat kiti chun thusim leh chon le ham kibahna anei u ahi. Eiho jousen jong thusim, chonna chuleh ham la pao khat ineikhom u ahi. Khul thusim, Benglam thusim, Twi-lut leh adang dangho hi avetsahna ahi. Hiche chungchon ah, tulai in Politics leh thaguma kibolna ahajehin

sopi sanggam tamtah namkhat ihinao aseidoh theilou atam tan, hijongleh nikhat leh ihung kigop kit diu ahi. Hiche nikho ahunglhun kahsea bolding chu, 'eiho hi namkhat ihiuve' ti ngalouva iseijing diu ahi.

Nam Pathen hetpi: Namkhat hidohna dinga mihem tam angai in, mihem atamna dinga Pathenin cha le nao, son le pah tampi eihin peh u ahi. Tam le lhom kiti hi Pathen khut a um

ahin, Namkhat hidohna dinga Pathen mopohna chu amihem tamsah chu ahin, achutileh Nam kiti hi Pathen tun ahi tiding ahi. Mihemin tamna dingin chaleh nao tampi hing jongleh adamsah leh avengtup chu Pathen hithou thou ahi. Namkhat hidoh theina dinga mihem hin tamsah chu Pathen ahin, Nam hi Pathen hetpina a hung kitungdoh ahi.

Nam chu mihem ahin, namkhat hithei dinga mihem tamsah chu Pathen ahin, hinlah amihem ho chun Pathen thilgon chu adonse louleh nam kiti chu dingdoh kitlou ding ahi. Hichena dinga

anam sunga umho chun anam akingailut uva, akisemdoh diu ahi. Chutobang a chu, anam pamlama um namdanghon jong 'hichete hi namkhat ahinaove' tia ahim pomthei u ngai ahi. Achutileh, vetsahna dinga, Kuki nam tundohna dinga Pathen toh Kukiho leh Kuki hilouho apankhom angaije tina ahi.

Hetbe ding chu Nam hi mihem ahin, mihem hi thithei ahi banga nam jong thithei ahi. Nam thi le hin chu Pathen toh Kukite leh Kuki hilou namdangho khuta kingam ahi. Ajeh chu, nam kiti hi achanga umthei lou ahi. Kuki hilou aumlou leh Kuki umthei lou ding ahi. Kuki hilouho aum jeh a Kuki umdoh thei ahi. Achutileh Kuki umna dinga chu Kuki hilouho aum angaije tina ahi. Nam kitih Pathen leh namdang toh kistem khom ahin, hiche hejing puma inam kismendoh ding ahi.

Eiho, tua India, Myanmar leh Bangladesh gamsunga um jousen tahsa taha ito uchu, tulai chileh nam gentheina hi achesa a Britishte leh tulai vaihomho natoh toh kimat ahi. Britishten gamgi jeng hilouvin nam chom chomin eina khenthang un, tulai iumna gam vaipohon namkhat ihinao umsun chonna, houna, ham le pao leh tahsa tah a kichotmat theina 1968 kuma ana kistem Free

Movement Regime (FMR) jengjong eikhapeh phatun ‘namkhat kahi’ tijong leohen hiche hohin lampi eikha peh u ahitai. Tulai a igelkhoh diu hi midang hon boundary seipehho chungvuma iti namkhat a iumkhom diuthei diuham tihi tai.

Nam mudan jatni: Nam semhoi theina dingin Nam vetdan jatni anave uhite. Sociology a kisei danin Nam thudol ah geldan jatni aum e. Khat chu, ‘nam kiti hi thisen a kingam ahin, aumsa ahin, eima dei dei a kichon le le thei ahipo’ ti gelloi aumin; anina ahileh, ‘nam kiti hi gam le go thudol a tupkhat inei jeh a kiki semthu ahi’ tia gelloi aume. Hiche hi Kuki leh Naga umdan tobang ahi.

Akhatna chepiho chun, namkhat kiti chu aumsa ahijeh in asunga umho koitobang alhase-amuise aumkhah jongleh hoija potdeh dingham tia kigelkhohna lhasam ahi. Hiche miho chun namsunga mi khat tou alhaset jeh a nam dalha aumjongleh ‘khatvei leh hung kile thou thou ding, mivangse ahi’ atiuva nam semtup ding agelkhohji lou u ahi. Hitobang nam chu lhasam jep jep ji a, ajona leh anam a umding jong mi lhom cheh chehji ahi.

Alangkhat ah, anina chepi hochun lungtup

lolhinna dinga midangho jong ahung lutna dinga kot ahonpeh uva, asunga umho jong ajamdoh umkhante tia kingailut naleh kingainatna ahatsah uva, nam phatah a akisem jiuva, anam hiding atam chan a agam u len cheh cheh ahi. Anina te hi akhatna pa sangin a nam u jong akhangtou jingin, amihem akibe chanin agam u jong akikehbe jingin ahi.

“...koima nam hi akisemchaisa umlou, athu akisei chana chu kistem sem jing ahi”

Hiche hi tulai Kuki leh Naga nam chedan toh kibangchet ahi – khat machal jep jep a, khat neosuh jep jep ahi. A ipi hitaleh, nam hi thisen a kingam ahi kiti henlang, tupkhat nei a kibol ahi kiti jongleh akisemthu hithou thou ahi. Pathen toh asunga umho leh apolam a umhon asemkhom u ahi. Chubanleh koima nam hi akisemchaisa umlou, athu akisei chana chu kistem sem jing ahi. Insah dan them Architect ho banga, Nam kiti hi idei dan dan a umdoh sahthei ahi.

Eiho gelding: ‘Nam’ kiti hin atoh pen chu, hiche nam sunga umho kibang tah a pohtup ding, suhtup ding, dinkhom a pankhoma, hahsatna hihen kipana hijongleh pankhom a kihinso

nading tihi ahi. Ajatchom jep a seidinga chu, nam kiti hi thilgih pohna ding ahi. Thilgih pohna dinga chu mijouse kibang chet a pankhom ding tina ahi. Hiche hi nam aumlon a pen leh anatoh pen chu ahin, architech insah themho nato banga, nam sem thempen pen chun anam sunga midangho ahin kailut jinga, phatah a ahoitup a, anam chu asemlet jep jep ji ahi.

Tua pat a Kukiten ihetjing diuchu Kuki kiti hi amun leh aphot toh kitoh a Pathen hetpina noi a ana umdoh ahi tihi ahi. Hetbe ding chu, namkhat ihi theina diuva mihem tamta a eina sem u chu Pathen ahin, tuchan a eihin dinpi jingu jong hiche Pathen chu ahijinge. Aban a hetbe kitding chu, Kukite phungvuh a namkhat ahijing theidinga hinsem chu Pathen ahitoh kilhon a, aban a Kuki amin leh amihem ho namkhat a hinsem doh chu asunga um eimaho jaona a apam langa midang Kuki hilouho jong ahi. Ikim ivel uva Kuki hilou aum jeh a tunia hi Kuki umthei ahi tihi ahi. Kuki hilou umhieh leh Kuki umthei louding ahi. Kukite namkhat ihi doh theina diuva poimo chu, achunga inasei bangun, Pathen, Kuki hilouho chuleh Kuki jouse ihieve.

Ajona ah, nam khantouna dingleh gal le tol

itokit louna diuva eihon ihetjing diu chu ‘Kuki hi aumsa ahin nom le chun da le chun Kuki a nahin ding, Kuki a nathi ding ahi’ tia asunga umho ngaichat gelkhoh pihlouva um hilouva, Kuki nam hi Pathen tun hijongleh kaki chinthem louleh thithei-mangthei ahi tia, dingchang tah leh makho ding saotah mu

a panlah cheh ding ahi.

Pathen lungdeia hung

kisemdoh chonna, ham

le pao, chuleh thusim

kibang Amol a pat

Zou sunga umjouse

hi namkhata ikisuh

chah diu, eiho kah a

kibah louna umho hi

nampi nei le gou (property or heritage) a ngaito a kisemhoina a mana namkhat a idinchah diu ahi.

**Kuki nam hi Pathen
tun hijongleh kaki
chinthem louleh
thithei-mangthei ahi
tia, dingchang tah leh
makho ding saotah
mu a panlah cheh
ding ahi**

Solchah Bung 17:26-27 a chun, gam le nam hohi Pathen phatsah ahidan akisei in ahi. Hiche hi ivetleh Kuki nam leh gam le go hi Pathen hetpi leh lunglhaina a kitungdoh ahi tithei ahi. Hiche hi Pathenin atun laise a umding ahi. Gam leh Nam hi Pathen tundoh ahitah leh eihon iti donlouva ikoi diu ham? Inam u hi alen in isemkhom diu ahi. Pathen lungdei banga igam leh inam iti

ikisemhoi diuham tihi eiho gelkhoh ding ahi.
Nampi kithodoh kitna ding thudol isei masangun
eina sugep u galpi thumho anave masa uhite.



II. GALPI THUMHO HETGILNA

“Pathen chu eiho dia kiselna le thahatna ahin, gentheihesoh pet tah a eipanpi ahi.” Psalms 46:1

Hilchetna: Galpi thum kiti hi 1917-1919 Britishte toh kidouna, 1992-1997 Manipur Nagate toh kidouna chuleh 2023 a

pat tuni gei a Meiteite toh kidounaho kiseina ahi. Hicheho thum ‘Galpi’ aki tina jehchu ahileh hiche galthumho higaleihin bolkhumhou chun phatah a kigonna (preparation) anei

**hiche galthumho
hi chomkhat
kihetthemmo jeh mei
mei hilouva, tup le
doi khat nei a phatah
a kigeltoh chet a galpi
a eihin bolkhum u ahi**

uv gal eikibolkhum u ahijeh a galpi thum kiti ahi. Ajeh chu, hiche galthumho hi chomkhat kihetthemmo jeh mei mei hilouva, tup le doi khat nei a phatah a kigeltoh chet a galpi a eihin bolkhum u ahi.

Tup le doi neicheh hijongleh, galpi nina hi eiho thinghlang gama ki engsetna jeh ahin, hiche hi ajatchom jep in phatdanga seidin anakoi u hite.

Galpi akhat naleh athumna vanghi akhohdan akibahna atamjeh in giljep in ana khol u hite.

Galpi khatna leh thumna akhohdan akibahna phabep aumin hiche ho chu aban ban in veo hite. **Akhatna:** hiche galpi teni hin atup chu Kukiten namkhat hina lungthim anei u (Kuki nationalism) hi suhmang peh ding, iham tia akijolel khah jongleh

**Galpi khatna leh
thumna hin Kuki
nam pumpi atup ahi**

inoi beh a kunsah ding atilhon ahi. Galpi nina atup jong hiche ahinan, hinlah Kuki nam pumpi ana hipon, gamkai khat sung bou ahi. Galpi khatna leh thumna hin Kuki nam pumpi atup ahi. Hiche hi gam kichu ahi behseh pon, namkhat hina lungput suhmang pehding ti ahi. London a British Library a document hon amusah dungjui in, Britishten gal eibol khumna jeh u chu 'to crush Kuki spirit' atiu ahi.

Hiche hi Kuki nationalism, ahilou leh 'Kuki kahiuvn, keiho jong nam dangho banga namkhat kahiuve' tia ilung gel u chu suhmang peh ding, khantou sahlou ding anati u ahi. Ajeh chu, Britishte chun igamu toupaha, ichunguva vaihop ding anatiu ahin hichu ina noplou jeh uva,

gal eina bolkhum u ahi. Alangkhat a chu, eiho ikhantou diuleh midang toh kibanga namkhat ihung hidoh diu chu ana deilou u ahi. Hiche banga chu, galpi thumna in jong atop pen chu, eiho thusim suhmang peh ding, ihinao identity suhmang peh ding, ichonna suhbei peh ding, ihou (religion) tha peh a, igam le go leh asunga thil mantam jouse kilah ding atiu ahi. Eiho hi ibul-ibal uva kaldoh a, suhnem jeng hilouva, igamsunga kona dalmang ding eitiu ahi. MLR & LR Acts, Anglo-Kuki War aumpoi kitihou, chuleh Tribal hi a thinglhang gam lah ding kitho jouse hi avetsahna ahi.

Hetbe ding chu, hiche galpi khatna 'Anglo-Kuki War 1917-1919' leh tuchung galpi thumna hin atop chu eiho A to Z tribe jouse ahi. Vetsahna in galpi masa chu British ten amin chom chom in ana melchih un - Kuki, Manlun, Mangvung, Haokip, Thadou, hiche tobang chun galpi thumna jonghi mihon Kuki, Zomi, Hmar, Thadou - tin eikhentel teikitun mi phabep jong amaho langah akikailut un, nampia a din nohphahna khat ahitan ahi. Amaho chu, itobanga thilpha boldan a akisei vangin eiho sung suhkehna ding chu hithou thou ahi. Akhutileh amaho jong chu galpi plan kibolna a chu pang thou thou ahitaove. Tahbah

a sei a chu, British document a khu Songpi/Lamka sunga Pelsonmun jong kimu a, chuleh haosa phabep jong Britishte douna a pang louva 'friendly allies' anahiu ahi. Tuchunga jong eiho sunga mi phabep amanchah kit uva, thilpha sei a akigel vanguva ajona a chu eiho nam hina nationalism suhnemna a pangkit ahivu. Hicheho hi ivet phatleh gal douna a pangho leh panglouho anigel uva midangte target hicheh ahi.

**Divide and rule
policy hi galpi masa
leh thumna a hi
kimang cheh ahi**

Anina: hiche galpi teni hin eiho hi khenthanga ichung uva vaihom ding (divide and rule bolding) atiu ahi. Britishte strategy

khat chu, eiho hi ipankhom uleh ijo loudiu jeh a suhkhen a chujouleh kiatpi ding tia eina bol u ahi. Hitia chu, Chin Hills, Lusei Hills and Manipur Kukite chungah hi gal aphant kibang louva ahin bol uva, khat akigalpi phat uleh khat akiloipi uva, hitia chu aban ban a eisuh gep u ahi. Hiche tobanga galpi thumna a jonghi akipatna chu Christian jouse hijongleh, aban a Nagate ahin otdoh uva, aban a Meitei christianho achom a ahin notdoh kit uva, aban a Kuki sunga min chom chom leh group chom chom mangcha a kikhenna

ahin semkit u ahi. Divide and rule policy hi galpi masa leh thumna a hi kimang cheh ahi.

Galpi thumna hi phatah a kigong hijongleh, May 2 leh 3 nia bangchun Manipur sunga Christian jouse khenchom umlouvin ana bolpai pai leo hitobanga igentheï loudiu ahi. Alangkhat ah, Christian jouse ana kipangkhom leh koiman hitobanga eibol theilou diu ahi. Christian dangho ajaotah lou jongleh eiho beh atil a bangchun kipangkhom jingpeh leh tunia hi gam le nam bitna dinga demand inei

u hi hiche sanga machal ding ahi. Galpi thumna hi phatah a agongtoh aum a, aphot dungjui a athu (narrative) kikhel

**Galpi masa leh
athumna hung
kipatna hi gampam
ahi**

a, athu kikhel dungjui a kibol gentheina jong ajat chomji ahi. Eiho dinchah leh chahlou dungjui a, hiche divide and rule policy jong aneo lam a hung che suh suh nalai ding ahi. Britishten Old Kuki leh New Kuki a inikhen uva, aban a hon Kuki, Zomi leh Hmar a eikhen kigot uva, ajona a Kuki leh Thadou min a eihin khen kit u ahi.

Athumna: Galpi masa leh athumna hung kipatna hi gampam ahi. Galpi phatchompi dinghi naicha

a ikimaitopiho jeng hilouva gamla tah a umho ahi. Galpi masa hung kipatna chu London ahi. Britishte chun, eiho France a amaho galsat a puiding, eiho thahatna leh potthona chu manchah a amaho gal joding atiu ahi. Amaho chun colonize eihung bolgot u ahi. Sum leh pai khel hihih jongleh eiho thu thale jung, hinkho chu amaho phatchomna dinga aman kigot u ahi. London a kon a eiho gama vaihop a, aphachom nei le gou jong lah thei thei lahding ti ahi. Nei le gou chu, India laisunga alah hou masala leh gold ho jeng hilouva eiho tha leh jung leh hinkho amaho galsatna a aman u jong chu resources eilah peh hou ahitai. Hiche hi colonization kiti chu ahi.

Galpi thumna ahung kipatna leh ahin puihoi jong gamdanga kon ahi. Eihung bolgenthei leh eisumang kigo chu iheng ikoma umho hijongleh athu hung kipatna, aphot dungjui a ahin thumop leh aphatchompi ding chu Manipur khel langa umho ahi. Amahohin eiho jaona a, thinglhang miho leh nam neo politics lama thanei joulou hohi amaho thu a nunsah a, agamsung uva vaihom ding, gamsunga thilman tamho jong kilah ding atiu ahi. Eihon hedoh hih jong leohen amaho duchat chu eiho gamsung a Thao leh thil mantam tampi umho hi ahi. Ajeh chu, India haosatna dinga

gamlai lungho a thilmantam (natural resources ho) umtalou, tua hi eiho gam Northeast hi gamga kitongkha nailou ahi. Galpi thumna hin aduchat hi hiche jonghi ahi. Eiho gamga duchar jeh a mihon eisuh genthei u ahi. Ajatchom jepa seidinga chu, Pathen phattheiboh ichanhou hi min aduchat jeh a thile man itolo u ahi.

**galpi masa hungbolho
agam uvah akinungle
taovin, hinlah galpi
thumna hungbolho hi
kinungle nom loudiu
ahi**

Galpi masa leh athumna akibahna, eiho dinga hetlouva khoh ma ma jeng chu hiche ahi. Hiche jeh a hetbe ding chu, tuhin chenkhopi Meiteite toh kicham jong leohen, gamga duchar jeh a boina dangkhat eihin bolpeh kit diu, gamga akilah doh kahseova eiho hi ihmu theilouva eihin koi jing diu ahitai. Galpi masa leh athumna in atop chu, migam a vaihop a anei leh gou lahpeh ding (colonize bolding) ti ahi. Akikhehna lhon chu, galpi masa hungbolho agam uvah akinungle taovin, hinlah galpi thumna hungbolho hi kinungle nom loudiu ahi. Hiche hi galpi masa leh athumna akikhehna ahin, akikhehnapa hi eiho dinga kichat umpen chu ahi. Hitobang dinmun a hi ipi igel uva, iti ikithah pat kit diu hitam?



*@Mangyidug
©Sinta*

III. KIPAL LHUHNA MUNHI KITHODOH KITNA DING MUN AHI

*“Keima lhujong leng kadindoh kit ding ahin;
Muthim lah a tou jong leng Pakai chu kei dia
khovah a pang ding ahi.” Micah 7:8*

Nampi kithahpat kitna dingin, ‘hoilai mun, itobang lah a kona chu kithahpat kitdingham’ ti het masat angai e. Hiche kicheh taha hetdohna dingin anoi a dohna thumho hi eima leh eima kidong cheh u hite. Kukiten gal inei jing un, hiche hi ipijeh ham, midangte jeh ham ahilou leh eimaho thepmo jeh ham? Galpi thumna itoh kal u Kum 2 avaltan, hiche jonghi amasa teni banga moh a kichai dingham, galpi Lina hungumdoh kit dingham? Hiche hohi khoh tah a igeldiu chu ahi.

A. Gelgilna

Hiche dohna hohi ikidoh leh thilthum kimudoh ahi. **Akhatna** ah, Kukiten galpi ineiji hou hi eiho pat hilouva midangin eihin bolkhumjiu ahi tihi kichen ahi. Britishten 1917-1919 sunga gal eihin

bolkhum u jong amaho hinpat doh ahin, tuni chana akiseitohna umlou 1992 lai a galpi ithohna hou jong ahung kipatna mundang anahi e. Hicheteni banga, tuchung galpi athumna jonghi ahung kipatna eiho sung hilou ahi. Hicheho ivetleh Kukiten gal itohou jouse hi eiho lungtup leh tohgon hilouva midangin eihin bolkhum jiu ahi. Eiho hi galbol hilouva galdou joh ihiuve.

Mi galbolkhum thei a um kiti chun thil tampi akothei ahi. Vetsahna in, midangte sanga gam le go, nei le gou, chihna leh thepna leh housatna a iphatthei jeh a mi thangthip kichang hithei, eima khochen vengchen kitup loujeh a mi noise kichang jong hithei, ahilou leh politics kikhel leh midangte duam jeh a genthei kithoh lo jong hithei ahi. Hiche thil hithei phabep holah a eiho dinga ahithei pen chu, Ipi-Ipute phatlai a Ipao Pathen lungsetna jala gam le go ana lamdoh hou chu tua hi midangten eiduchat peh uva, hiche jeh a hi kiging louva gal itojingu ahi tihi ahi. Tahbeh a, Government Act East tohgon in ajotpa jong eiho gam, Corporate hon aduchat u Leinoi a thil mantam umnaho jong eiho gam, chuleh May 3, 2023 masanga Manipur a officer len tampi jong eiho mi ahin, hicheho jeh a hi mi thangthipna ichan u jong hinte.

Anina ah, thusim inungvet leh, Galho hi eiho gon ahilou jeh a gal kinei neijing ahivanga akingahna kichehtah umji lou, akingahna kichehtah aumji loujeh a aphantseh leh gal inei jiu, aphant seh a gal ineijing jeh uva khantouna lam a minung kiphajou loudinga um ahitai. Tuchung jong akichaina kichehkhat aumlou leh hinkho tampi ilhahou jong moh hung hiding, galnei jong beideh lou ding ahi.

Gal hi eiho a kipan ahipoi tivanga, iboina hou hi midang moh ngoh a eima moh touthim ding ahipoi. Ipi itiuleh midanghon hitia gal eibolkhom jingu ham tijoh gelkhoh ding ahi. Apoimojo hi gal le tol a eihin bolho moso ding hilouva, ipi atileh mihon gal a eihin boljing u ham ti gelkhoh joh ding ahi. Ipi jeh a mite galboikhum theia kium jingham? Hiche hi midangho akihetthemsah louva, eiho phatchomna dinga iheidoh theilou uleh ajouleh vannoi oimo chan jeng hilouva adang danghon jong aban ban a gala eihin bol be be diu ahi.

B. Kipatdohkit nading mun geltohna

Tuchan a ichunguva galpi hung kibolkhumho

ikimaitopi dan u ivetleh, **akhatna** ah, eiho hin Leiset kiheidan leh iheng ikomin ipi agel em tijong gelkhoh lou, eima um um a um, min gal le tol a eibol jongleh akichaileh ihaimil paijiu, gentheina aphalam a kiheidoh hahsa sate ihiuve. Athu (ideology) geltoh a, chonna leh tahsan toh jopmat a, nampi kipuina kicheh lhasamte ihiuve. Tua jong thagum a kinotona ahung thipdom leh boina ho kihaimil a, min lungthim a ipi angaito ham tijong kidon behseh kit talou ahi. Khopi semding, kivaipohna kistem toh ding kitihoh jong deljui sanga eima eima hithei dan dan a kium kit ahitai. Pathen jala galpi masa teni leh tuchung athumna a jong mihon suhmang gamkei ding eitiu, ajolou u, ahivanga eihon kistemphatna a ineitheil nailou u ahi. Kho le veng kisemtup ding, houbung kiloikhom ding tiho jong aphot kikhel danin igeldoh kit taovin ahi. Khasuh kibanga kihoulima, thagum kipatna a pankhom a, lamkai khat noi a kipuihi hahsa kisa nalai ahi. Eiho hi thil gelkhohlou te, thil melchih sotlou te, chuleh aphading hejong leh kikhel hahsa te ihiuve. Hitia iumkah uva Ipu ipaten eina lamdohpih u gam le go tampi midangte khut a chedoh a igam u neosuh jep jep ahitai.

Anina ah, ilhahsapna u chu, eihohi ipilam hileh gelthuh louva, abai lai lai, anom lai lai holte

ihiuve. Lekha simding Civil Service exam bol a nomtah a haosat ding, Israel che a nomtah a hinkho manding, Penthah a baitah a Vangam lutding, Kani ahilou leh khamna theia business bol a kintah a houdoh ding, hiche ho jouse hi abai lam lam ivetnao ahi. Aban leh tulai a lekha simjousen eima hina, ham le pao, chon le khan idalhah uva midang umchan itho u, athem achingho leh haosa hon eima gam dalha a mi gamdanga ikhosah u, Pathen houna a igam a Pathen lunglhaina iti umсах dingham ti gellouva lhagao thuleh vangam thu bouseh kisei, chuleh eima gam le go leh hindan sanga midangho a kimusang, hicheho jouse hin buldetlou ihinao leh hetna leh tahsan lahtoh lou jeh a igamtoh kikhen ihi dan u eimusah u ahi.


Athumna ah, tulai ilhahsapna u chu themjilna (modern education) leh Pathen hou dan (Colonial form of Christianity) ikilahkhel jeh u ahi. Themjilna leh Pathen houdan midangho a imoh lah uhin, eima gam le go, chon le khan a kon a ibul uva eibodoh uva, idinna a dingchah thei talouva, kitah louna jouse ipohlut uva mi noise leh nuisat a ium u ahi. Pathenthu hunglut til a chu, ipi iputeo chun Christianity hi mithase natong nomlouho a ahi anatiu ahi. Ajeh chu,

Christianho chun Pathenni leh lou kon louva Hou in a kikhom u, chuleh hou in a chu leiset thu sanga vangam thu bou asejiu ahi. Hiche banga chu, school kai lekha simho jong chu mithase natong nomlou tia ana gel u ahi. Ajehchu, Pathen houjeh leh lekha simjeh a chu natong louva toumun a kivah ding tia ana kigel ahi. Eiho chonna (Indigenous knowledge) hi kitahna, thudihna, potthona ahin, hicheho pang louva modern education leh mikangte Pathen houdan a hou hin lhagao lam bouseh igelkhoh u hi ibolkhel u ahi. Lekhasim leh Christianity hi imankhel u ahi. Pathen hou dihtah leh lekha them chu mi kineosah leh mipontho hiding tihi ana kigellou ahi. Tua ingaichat u hi tulai chihna leh Pathen tahsah dantoh eima chonna hi ithahjop mat kitdiu ngai ahi.

Alina ah, achunga khantouna thudol leh Pathenthu ilahkhel u aga chu, tua ilah uva lhangphong tah a lamdih louva neh le chah holna pungjing, kitahlouna pungjing, kitahlouna a kon a eima ding bou kivetna hung um a, eima ding bou kivetna jeh a kitahsanlel tona hunglunga, kitahsanlel tona a kon a kikhenna leh kigalbolna hung sohji a, eima ikikhen thang phatleh igamsunga min eihin bulu denji

ahitai. Kitahlouna, thudih louna, eima dingbou kivetnaho jouse hi ipi-ipute chonna leh khandan toh kikal ahiuve. Achunga imubanguva, Kukite chonna chu, kitahna, thudihna, chonphatna, pot thona, chuleh khat leh khat kitheh tona chu ahi. Pu le pate gal masang leh thilha-sangah masanga ana hansen thei nao chu hiche chonna ho jeh ahi. Mi thudih leh kitah chu thilha in jong aki chat ahi. Tua hi eihon ihina idalhah phat uva igaldiu tamcheh cheh a, thilha-sangah kichatna leh gimbolna jong tamcheh cheh ahitai. Tulai a imalam jousea alhahsuhna u avetleh alungkham behseh jeh chun, eiho lah a song sun them khat Pu Jangthang² chun “Ipi-Ipu teovin hahsa tah a Pathen anahou doh u, a hou ngalpat uva detchet a ana tuhchah u, tua aban a hohin Pathen houna hi kichepna a inei u ahi” tin ana seijin ahi. *Achunga ilhinlel'nao imudohho jouseo chu ikipallhuhna u ahin, hiche laimunho chu ikipatdohkitna diu munho ahi.*

²Pu Jangthang hi songsun them ahijeh a Manipur gam aning akah a hi chele ahin, amahin thinglhang kochonga chapangho hinkho mandan geija amu apohnat behseh a asehi ahi. Asei nikho, 15/06/2025, amun Kuki Hut, Bethesda campus, K Munnom, Lamka.



Nachang Laidon
by Aching Zimik

IV. NACHANG LAIDON³ BANGA IKITHAHPAT DIU AHI

“...I Pakaiyu Christa Jesua um Pathen ngailutna kon chun thina, hinna, Vantil, vaipo pipu, tulai thudolla khonung a thun, thuneina, chungle noi, adang thilsem imachan eikhen thei lou ding u ahi.”

Rome 8:38 & 39.

Thinglhang gam Mei in akah phatleh thingna louna abonin akavamji in, phatchomkhat jouleh Nachangho alai ahungdon doh jiuvin ahung pilhing kitji taovin ahi. Hiche ‘Nachang Laidon’ banga tuchunga eiho galpi thumna a jong, hinkho tampi leh gam le go lenpi analha tajong leohen, nikho khatleh ihung kidodoh thou thou diu ahi. Ajeh chu Nam hi Pathen tundoh ahin, Aman umhen ati laise a umding ahi. Hinlah Nam semdohna dinga amanchah ding eiho iumkit lou uleh hithei dehlou ding ahi. Kuki nam semdoh kitna dinga eiho panna ding chu anoi a thuguh

³‘Nachang Laidon’ leh Kukite kithahpat kitding thudola kinepna hin tekah masa pen hi Saikul gamkai a Gangpijanga um Pu Mangcha Haokip ahi. Amahin Bethesda Khankho Institute a Postgraduate Diploma in Indigenous Studies (PGDIS) asim lai a hiche thulu hi ana phudoh ahi.

sagi hohi ahi.

A. Ngaidamna

Abul lam ah, achesa Galpi thumho hi eihon ipatdoh u hilou midanghon eihin bolkhum u ahi dan ina mutaove. Kithah semdoh kitna dinga achesa lainatna thusimho idalhah them u angaije. Hicheho jeha midang mudanna, thetbolna, ahilouleh amaho chungga phulah ding tia igeljing khah uleh eihojoh maban kichalbe theilou diu ahi. Ichung uva thilse anabolho chu ingaidam diu ahi. Amaho a kon a thum le ngeh jong neilouva ngaidam jengding ahi. Hiche hi mijousen hahsa isah cheh diu, alunghang jong iumdiu ahi. Hinlah maban a ikisemdoh kitna diuva hiche hi lampi umsun chu ahi.

Ngaidamna hi ichunga thilse anabolho chungga ilunggedan khelding tina ahi. Amaho chungga ilunghanna, ithangtomna, imudana, iphulah nomna chuleh athilse boljouseo Pathen khut a kingamlha ahi. Rom Bung 12:19 a chun Pathenin 'phulah hi keima kin ahi' ana tin ahi. Ngaidamna a hi ipohgih Pathen kiselhahpeh a eiman nomtah a lam kikijot ahi. Ngaidamna hi thudihlou kichampi (injustice compromise) hilouva, thildih louva thil kiboldho chungga thutan dinga

thiljouse chung a vaihom Pathen kipedoh ahi. Eima pohgih Pathen khuta kiseplha ahin, thilse kibolho chu kichampi hilouva Pathenin athu atan dinga kipelha ahi. Ajeh chu, mihem thutan sanga Pathen thutan chu dihjo ahi.

Ngaidamna hi eima ding ahi. Eima damna ding, eima hinnopna ding chuleh maban a pohgih beihela lampi saotah jot theina ding ahi. Hiche hi eiman ikihenna khao kiki lhaplhah tobang ahi. Aban leh Ngaidamna hi thil jouse Pathen ngansena ahi. Hiche jeh a maban a kithah semdoh kitna diuva, amasapen a ichunga thilse bolho ingaidam diu ahi. Iti ngaidam dingham tihi alampi semsa aumpon, midanga jong lah angaipoin, eihon eiho dinga phapen ikiholdoh thu diu ahi.

Ngaidamna a iheng ikom toh kisamkaina ihin semhoi phat uleh inam u hi hung kile kitding ahi. Galpi masa chun Chin, Lusei, Kuki tin eina khen un, Galpi nina chun Chandel langa sopi tamtah toh eina khen kit un tuchung Galpi thumna jong hin isopi tamtah toh eihin khenbe kit taovin ahi. Galinei chan a hi inam neo jep jep ahi. Gal nei tamte chu anam u jum jep jep ahi. Gal haote chu koiman jong abel nomlou ahi. Hiche jeh a

midang ngaidamna hi eiho dinga kalbi masapen leh apoimo pen chu ahi.

Maban kalsonna dinga Nam hi adam ngai ahi. Nam damna dinga tahsa, lhagao leh ilunghim u adam ngai ahi. Hiche hi eiho khuta um ahin, itobang ikilhen uchun nampi makho ahinpoh ding ahi. Mi ngaidam theite, thildihlou kichampi dehlouva gal le tol a kon a kihoidoh themte nam chu lampi jousea khangtou jep jep ding ahi.

B. Nam thudol a kithahpat ding

Nam thudol a kithahpat nadingin anoi a thilthumho gelkhoh apoimo e.

Akhatna ah, a nam min (Kuki) leh kuki kiti amihemho kikhensah ding ahi. Nam min hi imacha hilou ahi – akipahthei leh na sathei jong ahipoi. Apoimojo chu amihem ahi. Ana um masa, Pathenin ama lim bang banga asem chu amihem Kuki kitiho chu ahin amin Kuki hi khonunga amihemho dinga hung kistem ahi. Gelkhoh joh ding chu amin sanga amihem eihon A to Z (Aimol apat Zou sunga umjouse) ho chu ahi. Na sathei, alhasethei, kipah thei chu amihem chu ahin, amin chu iti kibol jongleh ima ahetdehlou ding

ahi. Nam semhoina dinga amin sanga amihemho chu gelkhoh joh ding ahi. Amihem sanga amin ngailut johna hohi eima mimal ding bou kivetna jeh ahi. Eima mimal ding bou kivetna chun Nam ahatmo sah ahi. Tulai a Nam min, phung le chang min a iboina hou jonghi amiho sanga eima ding, eima ego ahilouleh eima deisah ichungnun sahjah u ahi. Amin sanga amihem igelkhoh phat uleh Kuki nam hi hung hatdoh a, mijouse kihinsona hung hidoh kitding ahi. Kuki hi paokhat tho ho bouseh, ahilou leh kicheh tah a phunga sutlhah thei ahileh tribe neokhat bou hungsoh ding, amavang asunga um A to Z jouse dinga kihinsona, bitna leh kinepna ahung hidoh phatleh nam hi hung kiledoh kit ding ahi.

Anina chu, nam kiti hi achanga ding theilou ahi. Kuki hilou aumlou leh Kuki umthei lou ding ahi. Kuki aumtheina dinga chu Kuki hilou jouse suhmang ding hilouva, phatea a kiventup joh ding ahi. Hiche hi eiho chonna leh semtil a Pathen thilsem toh kitoh ahi. Eiho chihna leh chonna dungjui a chu Pathen thilsem jouse hi khatcha achanga phathei umlou ahi. Thilsem jouse hi akithehto ngensen ahi. Pathen jengjong mihemte bei a hithei lou ahi. Thil kiti hi khat aumlou leh khat umthei lou ahi. Hiche jeh a hi,

ichenkhompi iheng-ikom toh kitoh del a umding pa hi nam semdoh naleh semhoina pen chu ahi.

Athumna a hetding chu, Nam semhoina dinga hi asempa lungtup het masat angaije. Pathenin namkhat atundoh phatleh hiche namho ding jeng hilouva midangho jal chu hiji ahi. Israelte kilhenna jong ivetleh amaho ding bouseh hilouva midang dinga phatthei boh channa ding ahi. Nam hi Pathen tun ahin, Pathenin atun jingna dinga eima dingjeng hilouva, midang dinga jong phattheina hiding ahi. Eiho dingin chenkhompi Naga leh Meilhei toh melma umlou hi itup lenpen diu ahi. Tupet iboina hou hi khonunga kitona dinga heidoh tei angaije. Thudihho iti iseidoh uva, imolso diuham tihi ahi. Min gal a eibolleh 'kiven' chu iboldiu mong ahin, hiche kivena a kon a kingailutna leh chamdel a chenkhomna iti sodoh sah dingham tihi igelkhohjoh diu ahi.

C. Chonna a kisuhdet ding

Chonna leh tahsan hi namkhat dinga kibulphuna leh dindetna ahi. Chonna iti phatleh, hinkho mandan ahilouleh 'hitia lung igel a, ichon a, ium a chuleh na itoh leh mihem dingjeng hilouvin

thilsemho jouse dingin jong apha e' tia kibolho chu ahi. Hiche chonna holeh chondan hohi eima dei dei a bolthei hilou akingapna um ahi.

Kibulphuna: Ichonnaho kingapna Pathen thilgon ipi-ipu ten ana mudoh uchu 'Khat umlouvin khat apha theipoi' ti thudih leh thulu hi ahi. Semtil a Pathenin thiljouse asem a chu hiche jonghi anasemtha ahi. Aman 'thilsem jouse hi achanga hingthei ding umlouva kithehto ding, khat beija khat phatheilou dinga anasem ahi. Eiho **Khankho Nunkho** jong hiche thulu 'khat louva khat phatheilou' a hi kiphut ahi. Hiche Pathen thilsem hohi ipi-ipute chun akhang akhanga atahsa tahuva athiltona uva kona ana hetdoh uva, hiche thutoh chekhom dinga chonna pha (culture) ana mudoh u ahi. Ajatchom jepa seidinga chu chonna kitih amun le phat dungjui a Pathenin eina peh u chu ahi. Hiche chonnaho hi agam leiset a kon a hung umdoh ahin, agamtoh kimat kikhen theilou ding ahi. Vannoi ah chonna tampi umjongleh hiche chonna hohi aumna gam a dinga aphapen leh ahoipen Pathen thilpeh chu ahi. Koi hileh agamsunga uma, agam in akitopi chonna juilou aumleh amachu abul a kibotdoh tobang ahi. Chonna a kisuhdet ding itiphatleh akingapna Pathen natoh 'Khat umlouva khat

phatheilou' kitichu tuhchah kit a, hiche dungjui a chu kithehto, kingapto ding tina ahi.

Chonna leh kibulphuna thulu kaimat ding:

Aban a hetbe ding chu, eiho chonnaho, vetsahna a Tucha, Becha, Sunggao, Pu Lam, Pa Lam, Khamtang, Mongvom hohi achunga kisei thulu

**chonna ijui phatleh
chonna ahijeh a
bolding hilouvin,
Pathen thilgona
thilsem jouse
akithehto a, khat
umlouva khat
phatheilou ahijeh a
kijui ahi tina ahi**

toh akijopmat louleh panna bei ahi; mohseh jenghilouva ki engbolna jong hithei ahi. Ajatchom jepa seidinga chu, chonna ijui phatleh chonna ahijeh a bolding hilouvin, Pathen thilgona thilsem jouse akithehto a, khat umlouva khat phatheilou ahijeh a

kijui ahi tina ahi. Eiho chonna kibulphuna leh kipuijangna hi Khankho ahi. Khankho kiti hi thilmu dan (worldview) ahi. Khankho dungjui a thil kimu chu ahileh thilsem jouse hi kingamto leh kithehto (interdependent) ahin, khat hinna dinga adangho ahin masat angaije ti ahi. Achunga kisei eiho paogil a 'Khat umlouva khat phatheilou' kiti chu hiche lai a hungkon doh ahi. Hiche jeh

a hi khat in mikhat dinga thilpha abolleh khat in jong ama chungale bolji ahi. Hichu ‘**Khankho-Nunkho**’ kiti chu ahi. Hiche a kisamkaina a hi Pathen Amatah jong jao ahi. Pathen jeh a eiho ium u, eiho jeh a Pathen ‘Pathen’ tia kou ding um ahi. Igam sunguva ihinsot theina diuva Pathenin chonna eipeh u chu Khankho ahin, hiche Khankho chun Pathen jaona a thiljouse toh kimat leh kithehto ihuive.

Chonna a Pathenthu um: Hiche Thulu hin tua muthei chonnaho ahin umdohsah ahi. Hiche jeh a ichonna hou hi abul a thulu chutoh kaimat tei tei ding ahi. Tua ichonna ho u hi hiche Thulu hitoh ijopmat lou uleh Pu Papong in “Bulphut lou a Leh kithing chol chol”⁴

Khankho-Nunkho hi Pathen thilsemdan ‘Khat umlouva khat phatheilou’ ti thulu a chu kingam ahin, hiche jeh a chu Khankho chonna a hi Pathenthu um ahi

⁴Pu Papong hi amintah Mangkhongam Haokip ahin, Teiseng khopal Hengjang haosapu anahi e. Aman “Bulphut louva Leh kithing chol chol” anatiho chu amahina kihetlouva midang umdan dan a umho khu anaseina ahi. Pu Papong hi Henglep te son leh pah a kon a hungkon, Tingkaite sunga Hengjangte ahin, amahi Kum 1989 chun ana mollem tai.

ati banga, itobangin muthei chonna boljong leohen phachom louding ahi. Apolam a kithodoh chonna (external expression of culture) ho leh abul a Thulu hi ijopmat phatleh chonna hohi kilungsetna leh kipumkhatna hungsoh a, hichun Nam ahin semdoh ding ahi. Eiho chonna Khankho-Nunkho hi Pathen thilsemdan ‘Khat umlouva khat phatheilou’ ti thulu a chu kingam ahin, hiche jeh a chu Khankho chonna a hi Pathenthum ahi.

D. **Tahsanna a kisuh detding**

Hiche chonna thudol imu banguva, Nam dindohna dinga **tahsan** kicheh ngai ahi. Tahsan kiti hi genthei hahsat nikho a kingapna leh maban kalsonna dinga kinepna ahi. Tahsan dih a idin detchet lou uleh makho a icheh chaodiu ahi. Tahsan dih chu hiche ahi.

Pathen leh thilsemho: Pathen khatseh ahin, ngailutna a dim ahi. Amachun thil jouse asemin amalouva um khatcha aumpoi. Thiljouse itiphat leh muthei, mutheilou, idei leh ideilou, thilha sangah chuleh nigup sunga asemho jeng hilouva ani sagi nia asem ‘tahsa kicholdo nading nikho’

jonghi ahi. Cholngah nikhoa hi thilsemho akido doh uva ahinsotdiu hi Pathen lungdei ahi. Thilsem lah a mihem hohi Pathenin ama lim bang banga asem sohkei ahin, koima Ama lim bang louva asem umpoi. Hichejeh a chu mihem jouse kibanga koima chungvet chomding ahilouleh noivet chomding umlou ahi. Hindu caste system banga iphung ichang jeh a akhang akhanga mi soh ahilouleh Ehbo hina ding umlou ahi. Eiho jong tua mi noi a ium vanguva semtil a Pathen lungtup ichepi uleh nikhat leh ikido doh thou thou diu Pathenin koima anam nem chom, asangchoma asem lou ahi. Hetbe dingchu Pathenin thilsem jouse hi aki thehto leh kingamto dinga asema, hiche jeh a chu semtil a thilsem jouse kichamdela ana um ahiuve.

Mihem chonsetna leh Huhhingna lampi: Neipap kiloset leh, du am jeha Pathen ahinomjeh lhonin mihem (Adam leh Evi a kipat) chun Pathen thupeh palkeh in chonsetna ah alha lhontan, mihem ama leh ama kismepha thei ahitapoi. Mihem chonsetna chun thilsemho jouse jong atongkha in, tulaitah hi amaho jong thitheilouva umkit nading chu agaldot jingu ahi (Romans 8:19). Mihem chonsetna hin thilsem jouse atokhah banga, Jesu Khrista huhhingna hi thilsem jousen

jong angalel u ahi. Khrista huhhingna thupha hin mihem jeng hilouva thilsem jouse jong ahop ahi tina ahi.

Hitobang chonset soh a ium lai un, ngailutna a dim Pathen chun asemsa mihemte chu chonset a kon a chonphat achan kit nadiu lampi ahin gonpeh in ahi. Pathen Thum Khat (trinity) lah a Jesu Khrista, semtil a pata uma thiljouse ana sempa, amatah chu chonphatna lampi musah dingleh tonsot hinna pedingin tahsa thina leh thokitna kin ana chaitan ahi. Tuhin Ama chun munjouse leh phatjousen alhagaovin eiumpi jingun, eingailu jingun, hinlah chonset adeipoi. Amachun nikhat leh ama tahsan leh tahsan louho thu atanding, koi hijongleh ama tahsan jouse chu ahuhhing ding, atahsan louho vangchu tonsot thina achansah ding ahi. ahi. Pathen hi ngailutna a dim ahin, hinlah chonset adeipoi! Aman eiho huhhingna lampi eihin sempeh un, atahsan jouse huhhinga umding ahi. Hiche hi tahsan dih ahin, hiche tahsanna a hi idinchah uleh nampi kihinsona hiding ahi.

Eima gam a Pathen kimudoh ding: Achunga chonna thudol a kisei banga tahsan jonghi agam leiset a hungpeng doh ahi. Pathen khatseh ahin,

Amachu mun jousea um, thil jouse hungkon naleh alhun kit nading ahi. Hiche Pathen chu igamsunga thil umho a kon leh hicheho lah a eiman itahsa tah a inato ho a kona kihe a kitahsan ahi. Tichu, Pathen chu eihon iumna muncheh a kimudoh a kihou ahi (Psalms 19:1ff). Hichea apoimo chu, Pathen kimudohna dinga gam leh amu ding asunga mihemho chu ahiuve.

Thulhun lui khanga Israelte mudoh dan chun Pathen hi kiseikhel inte atiuvin, amin hi koiman a kam ah ana sosahji pon, mipi hettei ding angaileh YHWH ti in ana suttho jiuvin ahi. Hitobang chun, ipi iputeo jong chun kisei khel khante ti in Pathen hi 'Pu hou – Pa hou' ti in ana koujiuvin ahi. Ipi Ipu teo chun Pathen hi mihem hetjoulou ahidan ana hechen un, hijeh chun dingchang tah leh kinemsah tahin Pathen ana hou un, Pathen jong ana ging lleh un hiche jeh chun koima thilse bolngam jong ana umji pouvin ahi. Chuban leh Pathen thudol hi mihemin bulhingsel a hetjou ahiloujeh a ipi iputeo chu Hou thudol ah koima ana kina pouve. Hiche hi Pi le Pute chihna ahin, hiche chihna chu Pathen amudan uva hungkondoh ahi.

Tulai a eiho tahsan dan leh denomination a

ikitomona jiu hi 'kei Pathen hetdan adih pen e' tia lhagao lam a kiletsahna ahin, kiletsah chu Pathenin adeilou ahi, eiho chondan jong hilou ahi. Pathen katahsan e tia tahsan jal a midang toh kitimat theilou chu Pathen helou ahi. Tulai a eihon ihetdiu khat chu, tahsan kiti hi gou hilou ahi. Tahsan kaneije iti vanga thil le lo banga kinei hilou, Tahsan chun eima einei joh ahi (We do not own faith but faith owns us). Hiche jeha Pathen tahsandan kibahlou jeh a kikhen lou ding, kineosah a kithokhom dingjoh ahi.

Lhagaomi dihtah: Achutileh, eiho dinga lhagaomi kiti chu eima gam a hung kondoh

**Lhagaomi dihtah
chun Pathen angailut
ding, chuleh Pathen
angailut jeh a agam
le nam jong angailut
ding ahi.**

chonna toh kilhon a Jesus Khrista tahsan a alunglhaina a hinkho manding chu ahi. Pathen lunglhaina eiho chonnaho toh kilhon a Jesu nungjui hochu Pathen lungdeitoh kitoh a Khankho-

Nunkho hinpiho ahiuvin, amaho chun tahsa donlouva lhagao bouseh aboipi theilou diu ahi, insah inlhang donlouva amading bouseh jong aboipi theilou diu ahi, Pathen thilsem dangho

donse louva mihem ding bouseh agellou diu ahi, Leiset donlouva vangam bouseh agelkhoh theilou diu ahi, midang hinkho tongkha leova amading akigel theilou ding ahi. Lhagaomi dihtah chun Pathen angailut ding, chuleh Pathen angailut jeh a agam le nam jong angailut ding ahi.

Ajeh chu, igam a hungkon doh eima chonna leh Jesu Khrista huhhingna thu chu ikaikhom phatleh hitobang lhagaomi hinkho chu hungsoh doh ahi. Eiho hi Christian hivanga lhumlam (Western) miho sei jouse leh bol jouse imoh juijeng loudiu, Christian hivanga jong Israelte toh ikimoh tekah lou diu ahi. Christian hivanga Pathenin eimoh lah jeng diu hilou ahi. Gamsunga hung kondoh Pathenthuh toh kitoh eima chonna holeh Jesu Khrista huhhingna thupha dungjui a Pathen thu ikijopmatpi uleh hichu eiho dinga Pathen lungei hinkho hiding ahi. *Thiljouse sempa Pathen hi munjousea um ahin, Amachu Khul a kona eihin puidoh pao leh Galpi thum a kon a eihin puigal pao jong ahi. Hiche Pathen chu ituhchah kheh diu, hiche Pathen tuhchah jeha midang sanga phajo kahi tia jong kigel deh lou ding, ajeh chu tahsan dol thutan ding Ama bou ahi. Eiho bolding chu Pathen tahsan leh alunglhaina natoh, Khankho-nunkho hinpi chu ahi.*

E. Lamdih a neh le chah kihol ding

Pi le Puten ‘Tugasoh a kilamdoh alhouve’ anatijiuvn ahi. Hiche hi paogil ahi. ‘Tuga’ kiti chu loulhona tucha achang kibulna aga/alu kiseina ahin, hichun ako chu kivahna natohna a lepthol leh kitahlouna a nei leh gou kitem sanga eima tah in na toh a, eima tohga bou neh ding hi achesot ding pen ahi atinao ahi. Hiche hi masang banga thinghanga ulsa kai a loulho tei tei ding tina ahipon, hoilai hileh thildih a natoh a, koima tongkha louva kitahna leh thudihna a neh leh chah kiholding tina ahi. Achung langa chonna leh tahsanna a kiphudet ding itiu chu athu lama dindet ding tina ahin, tua igelkhom diu hi itahsa tah a hinpi dingleh natoh a totho dingho ahi. Mi nehding sukhahpeh louva kitah tahleh pontho tah a eima neh le chah kihol chu eiho pi le pute chonna dihtah ahi.

Kukite dia lhezna lenpen: Tulai eiho khanga thudih leh kitahna a neh le chah kihol ding ahahsatna pen chu bailam tah a sum le pai mutheina umho hi ahieve. Bailam tah a haosat kitem theina ho chu Kani leibol, khamna thei a sumkolvei, chuleh guhthim a mineh ding kilahpeh a haosat kitemho hi ahi. Hiche hi Bible

a haosat ding deina a Baal doi houho tobangchet ahi.

Lamdih lou Kani lei, khamna thei leh nehguh bol a haosat kistem aphaltouna chu ahileh hiche hin ilunggel leh hindan eikhelpeh ahi. Mikhat thina ding ahi ti hepum pum a Kani lei ahilou leh khamna thei kajoh leh kalung gel a chu mihem hinkho jana leh ngailutna kaneilou ahitai. Mihem hinkho gelkhohna neilouva kaum theileh, kei chu Pathen tahsan lou leh Pathen ginglou kahi ahitai. Hitobanga chu mihem hinkho jana leh ngailutna kanei theilou phatleh chonna leh tahsan paimang kahi ahitai. Tolthat kahitan, Bible in tolthat lungsungah Pathen lhagao achengpoi atin ahi (1John 3:15). Hiche jeh a hi lamdih louva khamna thei a haosat kistemna hin imi hina – chonna leh tahsanna – eikhel peh a ilhahsam nikho leh kingapna ding neilouva kiumji ahitai.

Pathen Ni kihou theilou ahi: Haimil loubeh dingchu, sum le pai, nei le gou sanga mihem insah inlhang poimojo ahi. Sum le pai neipet in mi kitheida jongleh thina jalkhun a ium nikho leh neh le don ding nahung peding chu mihem hithou thou ding ahi. Haosatna leh khantouna hi iheng ikomtoh khantou khom ding ahi. Mi sanga

haosatval jong eiho chonna leh Houdan toh kitoh
lou ahi. Hiche ahijeh a sum le pai leh haosatna
hi midang hinkho tongkha louva, eiman thudih
leh kitahna a kibol ding ahi. Hiche nadinga chu
Pathen tahsan ding ahi. Bailam tah a sum le pai
muna dinga Kham nathei leh lamdih louva neh
le chah kihol lou ding, hiche sanga ipi-iputen
akhang akhanga kona

Mi sanga haosatval atahsa tahuva ana
jong eiho chonna leh hetdoh u ‘khat louvin
Houdan toh kitoh lou khat apha theipoi’ ti het
ahi. a, koima hinna tongkha
louva thudihna leh

kitahna a neh le chah kihol ding ahi. Mathi
Bung 6: 24 chun, mihem khat pakai ni soh in
apangkop theipoi atin ahi. Eihon jong lampi ni
inei un; khat chu, lamdih louva sum le pai hol a
kintah a houdoh ding ahivang a ichate chungga
aga phalou lhungsah dingham, ahilouleh, anina
chu thudihna leh kitahna a neh le chah kihol a,
gangtah hilouva ol ol a akhang akhang a khantou
jingdinga hinsot ding kilhen dingham tichu ahi.

In asah jouva anei dingpa thi: Kani leh khamna
thei dang dang ibolho u aga chu, addiction jeng
hilou ahi. Addiction sanga phamo jo chu lunggel
dan leh hindan kikhelapa hi ahi. Achungga imu

banguva, Kani leh khamna thei ibol uva pat a hi ichon dan u leh hindan kikhel ahi. Pathen sem mihem hinkho jengjong ija theilou phatleh, kitahna leh thudihna hohi kidonji talou ahi. Chonna leh tahsan neilou chu amangthah ding hijeng ahitai. Ichateo hin khamna thei bolhih jong uleh eiho bol chu ahailou u ahin, hichu alungthim sunguva umjing ding, hichun gapha ahinso louding ahi. Ken Kani lei kabol vangin, ahilou leh khamna thei kajoh vangin kachaten khamna thei anepoi tia lungmon ding hilou ahi. Mihem hinkho khat tongkha a lamdih louva sum le pai nahol chun phatkhat leh nangma chungagentheina ahin lhunsahteiteiding ahi.

Lamdih jotdia Nampi lekouna: Eima Tugamanga nei leh gou kilamdoh ding kiti hi ihinkho a Pathen bouseh kisonpi a lamdih louva sum le pai hollou ding tina ahi. Insah inlhanghon lamdih louva In le lou thupi tah tah ahin kismdoh phat uleh ilungthim a thangetna leh kisonlelna umtei ahi. Hinlah hiche tobang phat a hi Pathen bouseh tahsan a, Ama lungdei bou hol a, Ama bouseh a kinep ding ahi. Hitia Pathena ikingap leh eijong kin tah tah a houdoh ding ahi tina hilou ahi. Haosatna chu Pathen khuta um ahin, aman phasah phatleh nikho khat leh mihem kiki le tei ahi.

Haosatna chonset ahi tina jong ahikit poi. Pathen lungsetna a dim chun ihaosat ding chu adei tei ding ahi. Hinlah Pathen lunglhaina eiho chonna toh kitoh chu, midang hinkho sukha a neh le chah kihol ding ahipon, kitah tah leh thudih a sum le pai kihol ding ahijoi.

F. Nam hi midangtoh dopkhom ding ahi

Nam umdan: Nam kitihi Pathen tun ahin, Aman umhen ati sunga chu umjing ding ahi ti in achung lam ah inasei taove. Hinlah Pathenin deijong leh asung leh apolam a umho apanding dola apanlou uleh hithei deh lou ding ahi. Ajeh chu, Nam kiti hi Pathenin mihemho mangcha a asemdohji ahi. Namkhat hidoh theina dinga mihing hintamsah chu Pathen bou ahin hinlah namkhat hithei dingin tamjong leo amiho apanding dola apanlouleh nam chu kitung dohthei dehlou ding ahi. United Nations in apom dungjui a Nam ahilou leh Indigenous miho chu asunga umhon 'keiho Namkhat kahiue' tiho chu ahi. Namkhat kahiue tihi eiman kisei sei jeng ding ahi.

Namdangho poimona: Hichetoh kilhona hetbe dingchu, asunga hon Namkhat kahiue tijongleh

avel a namdangho toh akitolou uleh hithei dehkit lou ahi. Namkhat hidohna dingleh, hijing theina dinga, ikim ivel a namdangho toh pankhom angaije, ahilouleh, ikim ivel a namdangho toh kitoh tah a hinkhom angaije tina ahi.

Kukiten Galpi thum inei taovin, hiche hi eihon midangho jeh ahi itiuvin hiche hi adihna jong um nante, hinlah eihon tijong leohen mi tamtah in eiho phatmo jeh ahi atitei diu ginchat um ahi. Hitobanga ana gelho chun eiho Nam tundoh ding chu athanoppi mong nadiuvm? Thanop sanga kichajo meithe diu ahi. A chutileh nam kitundoh nadingleh dinsotna dinga hi midangin jong panmun anei e tihi haimil louding ahi. Eima Nam tundohna dinga midangte panding dan hi jat chom chom umding ahi. Abang eikipapi um intin, abang chun eimuda behseh jeh a eima dinga aphalam a umdoh jong um inte. Hiche hohi eiman kikhodoh ding ahitai. Hiche thudol a midangho boldan gahve uhite.

Kum 1992 – 1995 sungin Yugoslavia ana kiti Balkan gamsungah chileh nam kitha tona ana um in, hi achun mi lakh khat vel in thina anathoh in, mihem million 2 velin thohgimna anathoh in ahi. Mi kitha melset thudol ah, hiche kithatona

chu Natzi phatlaija Jews te kitha tilouva amelse pen ahi akitin ahi. Hiche thudol a hin, Dr Miroslav Volf⁵ chun eihin thatding hohi ikom a um iheng ikomho ahin, ibitna dinga hi amaho chutoh kichamdel a umding ahi anatin ahi. Amachun ‘your security is in the hands of those around you’ anati in, hichu, mikhut a nathoh dingleh gamla tah a umho chun nahin thamphah louding, nakimvel a umho chu hiding ahijeh chun nangma bitna dingin amaho chu kichampin ati ahi, ajeh chu nangbitna chu amaho khut a um ahi anati ahi.

Gelphat ding: Eihon khoh tah a igeldiu hi gal le tolinei jingu hi ipijeh mong mong ham, midang jeh ahitah jongleh hiche a kon a hi kivendoh theina lampi umlou mong ham tihi ahi. Mitoh iti chenkhom dingham, chenkhompi toh ikinah tah a ahijongleh iti suhtoh dingham ti lampi ihahol

⁵Miroslav Wolf, *Exclusion & Embrace: A Theological Exploration of Identity, Otherness and Reconciliation* (Nashville: Abingdon Press, 2019. Revised)

diu angaije. Ajeh chu, khangkhat sunga galpi ni le thum neiding manthahna hiding ahi. Hiche ihettoh kilhona chenkhopi namdangho toh kichamdel a ichenkhom diu angaije. Amasa pena achesa thinglhang miho kah a kihetthem louna hohi suhcham aphaí. Achesa dalhah a, makho lampi thah kisé aphaí. Achesa thilho melchihna kibolho leh akibol danho (September 13th Black Day) jong makho a kalsebe theina dinga semtoh aphaí. Chuleh, tulai galpi ithohjingu jonghi hitia hi chejing theilou ding ahijeh in akichaina dinghi eihon kicheh tah a igellah uva, eiho deidan idinpiu angaije. Namkhat a idinjou jing nadiuva adeilou atamleh makho a lampi tum hahsa ding, ima sei aumlou leh Kalson baijep ding ahi. Eima changa nam kitungdoh theilou ding ahijehin nampi hi midangte toh dopkhom angaije.

G. Gam le Nam Dinjouna dinga Pathen inungbel kitdiu ahi

Hichetna: Pathen nungbel kitding kitihin, Pathen idalha taove tina ahi. Pathen idalhataove tihin tulai ihin dan hou Pathenthú toh akito h tapoi tina ahi. Hiche hohi, adeh a, Christian ihuva ahivanga ilah uva chonna leh tahsan khohsah talouva, sum

le pai ngailutna jeh a lamdih louva sum le pai holna, chi le nam, phung le changa a kithettona, kitha kimat, numei pasal lam a kitah louna, chuleh ju le sa lam a motchonna hohi ahi. Hiche hi Pathen a kon a ijamang uva semthu sum le pai, nei le gou ihouna u ahi. Hijeh a hi Pathen inungbel kit diu ahi. Pathen nungbel kitding tihi munkhat a thildang donlouva lhagaothu bou sei a moh tao tao ding tina ahipoi. Ajeh chu natoh bei a tahsan chu athisa ahin (Jacob Bung 2:14-26), kikhotona leh thudih bei a Pathen houna chu Pathen kidah thil ahi (Micah 6:6-8; Jacob 1:17). Hiche thudol aban anoi ah anave kitnau hite. Hetding chu, isempa Pathen nungsun a, mihem semsa thilsem chungga kingap chu manthahna ahi. Ajeh chu, isempa Pathen chun eiding ageljing ahin, hinlah hinna neilou mihem thilsem sum le pai leh neile gou chun kilungset leh khotona neilou ahi. Hitobanga kingap khah ding chu eiho dinga manthahna hiding ahi.

Eiho dia lampi umsun: Pathen nungbel kitdinghi eiho dinga tahsa leh lhagaova dinjouna lampi umsun ahi. Pathen, angailutna a thiljouse sempa, mihem jouse Ama lim bang banga sempa chu inung belphat uleh ama jeh a chu ithilmu dan u hung kikhel ding, ilah uva kingailutna leh

kipumkhatna umding ahi. Pathen, Khul kiti a kona eihin puidoh uva, galpi thum chan a eipuigal kai pao chu inungbel kitphat uleh ama jal a chu gam le go leh ithusim ngailutdan jong ihin hetuva hichephat lechun idinsot joudui ahi.

Pathen belding, chuphat leh Aman eihin kithopi diuva gam le go eihin pehdiu tihi munkhat a tao tao jengham, ahilou leh Pathenin eihuhdoh diu ahi lungmongun tia sun lai a Ahcha kilhem ihmu banga gaothu sei a kilhep lhez ding chu hilou ahi. Ahilou leh, Pathen chu mihem banga ngaito a, Alung alhaina dinga Bible bouseh sim a, Missionary natoh bouseh bol a, Hou In phatah a kai ahivanga midang khohsah louva eima insung bouseh kikhoh sah leh hicheho tobang eima lungsuhto a Pathen hou jong hikiti lou ahi. Hou lamkaiho jengjong aphot leh amun dungjui a Pathen lunglam ipiham ti hollouva atoh ngai ngai tong mei mei ahiuleh Pathen natong hilou houbung natongjoh hidu ahi. Ahitileh Pathen belding kiti hi ipi sein a hiding hitam?

Pathen ibel leh isopi kibel ahi: Pathen belding, hiche phatleh aman eihin panpi diu kitih i amun leh aphot toh kitoh a Pathen lunglam boljeh a ichunga thilpha lhungding tina ahijoi. Thilpha

kiti hi van a kona hung khelha hilou ahi. Pathen lungdeihō ibolleh midang kipana kiboldoh a hiche a kon a chu thilpha hung umdohji ahibove. Hiche hi angaina khel a thilsoh (miracle) aumpoi tina ahipon, miracle um ahin, hinlah thilpha muna dinga hi amutheina ding lampi aumin hiche lampia chu icheleh thilpha umna chu akilhung theije tina ahi. Thilpha khat - vetsahna a, kitona, kichamna, khantouna, kingailutna leh adang dang – mutheina dinga tao tao jeng hilouva ilung ikhela, ikito a ikichamleh hijeng ahi. Hiche umtheina dinga Pathen panna chu, akingailu thei dingleh akicham thei dinga lunggel ngaitona eipeh u chu ahin, eiho kin ahileh kingailut a kicham chu hijeng ahi. Pathenin aki panpitheding, aki ngailutheidinga eikoi tahleh kingailut leh kipanpi chu eiho kin ahi. Pathenin aki ngailu thei dinga eikoi ta a, eima bolding kingailut ding donlouva Pathen koma tao tao chu bolkhel hiding ahi. Pathen tahsan ding, alunglhaina holding chuleh ama dinga hinkho man leh natoḥ chu thilpha muna lampi ahi. Taona hi iboldoh joulou dingho boldoh theina dinga bou bolding ahi.

Pathen ibel leh thilpha kichang ahi: Pathen ibelkit uva, khat leh khat ihung kingailut kit phat uleh hiche jeh a chu thil pha tamtah hung

umdoh a gam le go jong hung umding ahi. Ajeh chu, ikingailut phatleh kidamsot a, idamsot phat leh thilpha tapi kiboldoh ahi. Akipatna langa kisei banga, Pathenin thil jouse hi akingamto dinga asem ahin, eima dingbouseh kigel louva ikingailuta ikngapto phatleh Pathen lungdei thilpha chu kichangji ahibove. Hiche hi Pathen chu formula tobang ahin, hiche formula chu ijuitohsel leh thilpha chu idei dan dan a kimu jengthei tina ahapon, eima lung suhto a Pathen housangin Ama lunglhaina ihol a, na itoh a, hinkho imanleh hichun thilpha lam ah eipui lut theije ti ahi.

Pathen ibel leh kiding jou ahi: Pathen inungbel kituva, sum le pai leh haosatna ho jouse sanga, amihem eiho khat le khat ihung kingailut joh phat uleh imakho uva huipi banga hungding Hindutva ideology hihen sum le pai deijeh a gam leiset leh asunga Pathenin eipeh u thilmantam (natural resources) kijoh nomna lhezna itobang hung jongleh idinjou diu ahi. Ajeh chu, ideology, sum le pai, haosatna jouse sanga amantam chu amihem, eima ho chu ihuive. Hijeh a hi Pathen bouseh a ikingap diu, Pathen bouseh a ikinap diu, Pathen bouseh ihoudiu hi tuleh khonunga ikihinso theina pen u ahi.



Margherita Sante

V. TUTUA BOLDING HO

“...[Joshuan amipite adongin] tunin kilhen jengun, luipi gala napu hou napa houvu nahou uva pathen lim semthu ho nahou diu ha, nachen nau gamsunga Amor mite pathen limsemthu ho [Sum ngailut jeh a lamdih louva chonna] joh nahou diu ham? Keile ka-insung miten vang Pakai kinjeng kabol diu ahi.” Joshua 24:15

Hiche lekhabu in atup penchu tulai galpi akichai jouleh Kuki nam hinkho ahoijo a tundoh ding ti ahi. Lungtup lhunna dinga tu tua hi kipat angaije. Tutua inabolpat jengdinghou chu anoi a hohi ahin aban banin vekhom uHITE.

A. Tu idinmun u khel angaije ti pomchek ding:

Tutua bolding amasapen chu, idinmun u hetchet masatpen a, idinna mun khel angaije ti pomsok keiding hi ahi. Galpi masa jouva dinmun, galpi nina jouva dinmun leh tua galpi thumna jouva idinmun u itobang akibahna leh akibah louna um em ti ihetchet uva, hiche dungjui a hi kithahpat lou akhohtai ti inop sohkei u apoimo e.

Galpi masa leh anina jou chun, gal akichaileh adang kichat ding ana umpoi. Hinlah tuchung galpi thumna a hi kibolgentheina kichai lou ding, kikhelna khat ineilou uleh imahthah diu ahi tihi inopcheh u angaije. Eiho dei SA mujong leohen gamga dachat jeh a kiboi gentheina hi umjing

**Galpi masa leh
anina jou chun, gal
akichaileh adang
kichat ding ana
umpoi. Hinlah
tuchung galpi thumna
a hi kibolgentheina
kichai lou ding,
kikhelna khat ineilou
uleh imahthah diu
ahi tihi inopcheh u
angaije**

ding ahi. Galpi thumna in, galpi masa teni sanga nasatah a eisuhnem kit u ahileh, tu idinmun u hi amasa teni sanga jatchom mong mong ahitai. Kikhelna neilouva, tu iche bang bang uva hi iche uleh alampiu jum cheh cheh ding, ajona leh chi le nam jong mangthah ding ahi, koima aum nom umtalou ding ahi.

Anina ah, eimaho sunga nampi thigam nading tahsan leh chonna sanga Sum joh asangpen a ikoi u hi eiho dinga manthahna hiding ahi. Sum ngailut jeh a Kani leh khamna thei ibol u hi apolam a kona hung melmate sanga tijat umjo ahi. Kani lei ingahlou uva, Ju le Sa neh ingah lou

uleh ilah uva ihou u Christianity leh ichonna u bei a ihung chehchao diu, ikingapna u tahsan leh chonna (foundation) ahung lhahsam phatleh deilheh jong leohen gam le go ihuhjou lou diu ahitai. Hiche ahijeh a, tu idinmun u het a, aphalam a kikhellou akhoh tai tihi inopsoh kei diu angaije.

B. Lamkai dinga kigonna:

Nampi kivaipohna thudol hihen, akhohna a thaguma mitoh kidinte dinga kiloikhomna hihen, chuleh Houthu leh civil society kiloikhomna hijongleh lamkaipha umlouva, maban ichalbe joulou diu ahi. Hiche jeh a hi, maban a lamkai ding kigonna hi inei u angaije. Hiche hi tua lamkaiho khel tei tei ding tina ahipon, koi hileh tua ikilamkai u tobang hilouva, aphajo leh ahoijo a mipi hin lamkai thei ding chu iseina u ahi.

**lamkaipha umlouva,
maban ichalbe joulou
diu ahi. Hiche jeh a
hi, maban a lamkai
ding kigonna hi inei u
angaije**

Tuchung galpi thumna a imudoh u chu, tahsa lam hihen, houlam ahilou leh galmi kidinte pidingho

hijongleh ilhinlelna u chu umsoh kei ahi. Hiche hi koima oimona ahipon hinlah tuchung nampipi joulou u hi inopsoh kei diu ahi. Eihon mingal eibol khum got u ina hetphah lou u ahi. Ken kahe masa e ti umjong leohen ima inabolloujeh uva nampipi a dinga phachomlou ngen ihu ahi.

Tua pat a lamkai dingchu khonung khoma hethem, ama jeng jong kitim joulou Ju le Sa ne

**eiho hi Christian
ngen ihitah jehun,
nam mite lamjot
alamjanna dinga
houbungin pan
ahalalah dehset angaije**

a, lamdih louva natong leh phung le changa mi veho hilou, Pathen ginga mipi ngailu hiding ahiuve. Amahochu nampipi abon a hinpuikhom thei, Nam hin kehlen thei leh Pathen deibanga

nampipi puihoi thei hiding ahiuve. Hitobang ilhunna theidiuva amahochun, namsunga kitha kimat chuleh nam mikhat thina leh manna thei bol hilou diu ahi. Tua pat a lamkai a pangding hon hitobang lamkai hidinga hi ina kigot masah uva, lamkai kilhenna aumphant leh mipi honjong amahotobang ikilhen diu ahi.

C. Houbung hin Nampi lampi akomu ing ahi:

Pathen lungseta eiho hi Christian ngen ithah jehun, nam mite lamjot alamjanna dinga houbungin pan ahalah dehset angaije. Houbung hin nam mipite hi achena jouseova Pathen lungdei lampi ikomu u angaije. Ajeh chu, Kukiten galpi anei nei jenguva mikhut a asang aja ithijing diu hi Pathen lunglam hilou ding ahi. Pathen hin khat thagam dinga namkhat ahin tundoh louding ahi.

Houbung mopohna aletjehin eiho lah a Houbung lamkai ding hi Full-Time a Pathen natongdinga kipedoh, Pathenthuhna leh jilsangna nei chuleh lampi jousea tahsan theiho ahiu angaije. Adeh a Kuki nam sunga Houbung kivaihopna a thukhina bolding Chairman ahilou leh Moderator kiti hohi amaho chu hidiu ahi. Hitobang pastor ineilou uleh ikisemdoh thu diu, milham vang hilou ding ahi. Ajeh chu, houthua kivaihomna a houthu lam a hetgilna neilou lamkai chu, tahsa damlou khat operation bol dinga medical doctor hilou khat kinganse tobang ahi.

Houbunghi alamkai dingdolin ahin lamkai phatleh amaho chun, mipi koma Pathen tahsan thu toh gam le nam kikah umdan ding ahin

hitthemsah diu, Pathen tahsan thudol leh mipi dinmun jat chom chomho kikah ahilthemuva lampi jouse a nam mite Pathen lungdei lampi dih komu ding ahi. Tulai, adeh a galpi thumna a, hou lamkaiho imite genthei hahsatna hepha behseh louva ium uhi dihlou ahi. Politics hihen nampi hahsat gentheina hijongleh ikikangse jeng uhi dihlou ahi. Ajuh chu, imite genthei hahsa ho lah a hi Pathen um ahi. Pathen umna a chu houlamkaiho jong aum ngai ahi. Atoh diu chu ahileh, Pathen lunglam ipiham ti hetsah ding ahieve. Imite gentheina a houlamkai aumlou phatleh mipi vahchek ji ahi.

Houbung itiphat leh mipi jouse jong jao ahijeh in, lamkaiho bou nganse louva ibon uva Pathen lung ihol cheh diu ahi. Tulai a mijouse panna ding chu khamna thei neho leh joh ho huhdoh dinghi ahi. Galmi sanga kichat umpen chu khamna thei bol jeh a akhangkit a lamkai ding leh gam huhding umlou ding khopa nungah gollhang tamtah ahung thigam dinghi ahi. Makho a gam huhding leh lamkai ding mi ahung kilhahsap leh igam u chu midang khat a umthou thou ding ahi. Gam le go jeng hilouva, Christian hina hung manga ajou phatleh mi khutnoi a ihung umdiu ahi. Khangdongho huhdoh dinghi tutua itoh diu lenpen khat ahi.

D. Thil lenjo hinpi ding

Athu umdan: Gentheijeh a eima ding bouseh ivet uleh hiche gentheina a chu ium den diu ahi. Thil lenjo ivet uva ihinpi diu angaje. Thil lenjo chu, eiho hi kigenthei henlang kinopsa jongleh midangho Pathen mingailutna hetsah ding ihiuve. Pathen tahsan leh Pathen ngailutna ahelouho hetsah chu akibang ahi. Tu le tua igeldoh uva, itoh pat jengdiu chu iumna jouseova, chuleh iumlouna uva jong, midangho Pathen mingailutna hetsahhi ahi. Hiche hi thil lenjo chu ahi.

Hilchetna: Thil lenjo bolna dinga hi eima sunga genthei hahsaho donlouva 'Pathen natohna ahi' tia gampam a neijouse sunlhah khel khel chu

ahipoi. Tulai iboina hou gellou ding, koima kithopi lou ding tina ahipoi. Hiche jouse toh gom a chu hoilai ah umjong leohen, Pathen tahsante dingin midangho Pathen ngailutna hetsah hi haimil lou ding ahi tina ahi. Hiche thulu hi ihinleh hinpi ding, igenthei leh gentheipi ding, ikipa leh kipapi ding, ihinna a chu hichehi jaosah ding tina

Gentheijeh a eima ding bouseh ivet uleh hiche gentheina a chu ium den diu ahi. Thil lenjo ivet uva ihinpi diu angaje

ahi. Hinna dinga anneh le tuidon angaichat banga Pathen ngailutna midangho musah hi ipeltheilou u mopohna ahi.

Abolding dan: Thil lenjo bolding dan lampi tampi umding ahin, hichu eima eima umna a ikiholdoh diu ahi. Hinlah bailam taha boljeng thei chu, gal ijamna munho, relief camp, leh neh leh chah kiholna, chuleh themjilna leh natohna office munho a iumna jouseova hiche thil lenjo hi ihet jinguva ihinpi diu ahi. Vetsahna in, tulai in Bangalore ah nurse simna theiding lampi akisem e. Sum neilouho dingin amaho chu natohna dang akisempeh in amaho leh amaho ki support diu ahi. Hiche nurse course ahinchai phat uleh Europe gama natohna kistem peh a, Pathen ngailutna midangho musah theina dinga sumlo a cheding ahivu. Hiche tobang hi, thepjilna hihen, natohna hihen, galjamna hihen galjam louna hijongleh ihinpi cheh diu angaije. Akhoh pen a, nam lamkai Kuki Inpi, CSO jouse leh political demand dinpiho jousen eimaho hina dihtah Pathen tahsan chate leh khankho neite ihinao namdangte lah a imusah diu ahi.

Aphatchomna: Thil lenjo hinpi aphatchomna jatni umding ahi. Akhatna ah, eima leh eima kimudan

leh midangho imudan (perspective) hung kikhel ding ahi. Tichu, eima nam sung bouseh hilouvin namdangte chungga jong mopohna kaneije ti ihetleh eima imanlut naleh ipoimona kihedoh thei ahi. Thilmu dan ahung kikhel phatleh ihinkho mandan leh hindan jong hung kikhel ding, hichu eiho dinga lungletna leh tahsa leh lhagaova lama kithah thokitna akipatna hung hiding ahi. Itahsa in genthei athoh jinglai a lhagao leh lungthima kithodoh thei ahi. Lungthim leh lhagaova ikitho masat louleh tahsa a kiki thoudoh theilou ding ahi. Thil lenjo hinpi hi iki thahpat kitna diuva kalbi masapen ahi. Anina ah, thil lenjo ihinpi hi namdang hon eihetna u, gal deite, koima toh kitoh loute kitiho jong hungbei a Khankho nei Pathen mite tia eihin hetdiu jong ahi. Eiho pat hihih jongleh, gal le tol itam nei behseh phat un mitampin eimuse taove. Hiche suhdihna ding leh makho a kalse bena dingin eima society bouseh hilouva midang jong hoptha a lunggel leh natoh bolding ahi. Galpi thumna jouphat leh phatah a ikiphu dettheina diuvin tu le tua hi ikipat jengdiu angaije.

Thukhina

Tupettah hi Lamkasom a um tobang ihiuve. Tua lampi ikilhen u hi lampi dih ahileh ikihinso diu, lampi dihlou ikilhen khah uleh chile nam minjong hungbei a, imanthah diu ahi. Tu dinmun a ihetdiu chu, ithusim uvah galpi thum inatoh un, gal masa bolte a inlam uvah akile taovin athu u athiptan, anina thu jong Pathen jalin hung pha phanan tin, hinlah tua athumna pen hi kitha kimat thip jongleh boina hi akhang akhanga hung che nalai ding ahi.

Galpi thumna hin atup jatchom ahi. Hiche hin amijong suhmang ding, agam jong lah ding, chuleh gamsunga thil mantam jouse jong kilah ding ti ahi. Eiho dinga hiche galpi thumna hi chi le nam, sum le pai thu sanga tahsan gal ahi. Itahsanna uleh ikinepna u chu koi chung a ahilouleh, ipi chung a ingap diu ham ti hi ahi. Ideology, political party, sum le pai, ahilouleh mihem khat chung a chu ikingap diu ham ahilou leh Khul a kon a eihin puidoh uleh galpi thum chan a eihin puigalkaipao Pathen hingjing chung a chu ikingap diu ham tihi ahi. Tuchung galhi thildang jouse sanga tahsan kipatepna gal ahi. Namkhat hina jala eihon idinjouna diuleh idinjoujingna

diuva Pathen bouseh ikilhen chehdiu angaije.

Pathen bouseh ikilhen phat uleh, hiche Pathen chun eiho dinga ipi adeiham tichu ihet uva, ihinpi phat uleh ikihinso thei diu ahi. Pathen chun namkhat ihidoh theina dinguva cha leh nao, son le pah tampi eipeh uva, mi tamtah a eisem u ahi. Aman eiho jouse hi kibang tah a eisem uva, kibang tah a eingailut cheh u ahin, hiche hi het a, ilah uva kithet leh kitomona ho pailhah a, Pathenin namkhat hidinga eideisahna u hi khoh tah a gelcheh ding ahi. Anina ah, Pathenin eingailut jehuva gamtum eina peh u ahin, tulai a eihon hiche gam chu ingailut diu, leiset tahsa thiljeh hilouva Pathenin eideisah peh u ahijeh a Gam le go ikivenbit diu ahi. Athumna ah, Pathen lungdei ahijeh a inam uleh igam u ingailut phat uleh midang jouse lah a Pathen kimudohna ihung hidoh theidiu ahi.

Tuhin Pathen belkit u hitin, Nachanglai bangin kiledoh kittao hite. Lamkai hihen milham hijongleh Ju le sa, sum le pai leh ideology dang dang ah kingam poute. Pathena kingamin, midang ngah louvin, thilpha kiseiho bolpan jeng taohite.

PATHEN TUNDOH KUKINAM PHATHEN A DING!

